

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 3285 del 23/11/2024

Traduzione in ladino

“Pedies”: l é fora la puntata #461 del program ladin per la televijion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata 461. I argomenc de chesta setemèna l é: l projet Troupes, endrezà da la sociazion Inout, ti dis passé l é ruà fin te la Sardegna per tor pèrt al event “Davegnir impari” che à metù ensema fascegn e sardi per n moment de confront sul davegnir de la mendranzes; l é stat ence prejentà l ejit del projet: doi curc filmac “Al dì de doman” e “La gran lavada”, che i vegn porté dant ence te Fascia en domenia ai 24 de november da les 5 domesdì te Istitut cultural ladin; a 15 egn da la desgrazia de la Val Lasties, l Socors da mont de Fascia à metù ensema n calandèr per recordèr Alessandro, Diego, Erwin e Luca, morc per portèr aiut; chest projet no l se ferma demò al recort, ma l conta del sentiment che lea l viver del om sa mont, con sie teritorie e sie ambient; i Servijes linguistics e culturèi del Comun General de Fascia dessema coi comedianc de Fascia endreza la 3° Rassegna de teater ladin! La rassegna la scomenza ai 30 de november e la va inant fin ai 4 de mèrz, la tol ite 6 gropes de teater che portarà dant 15 apuntamenc con comedies, spetacoi e mascherèdes; endèna la rassegna vegnarà recordà Vigilio Iori rechia, om che se à dat ju n muie per l teater! “Stroria de amor e fadie” l codejel che conta la vita de Isabella Iellici, cresciuda coi giaves sun Penia, na piccola vila fora da Moena, dalonc da la mère che la lurèa demez; na biografia testimonianza de n picol mond anchecondi dut mudà, con n fort messaje de emanzipazion de la femenes.

I servijes de chesta setemèna, enjigné da Angela Pederiva e Riccardo Zanoner, i vegn porté dant da la ousc de Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol.

“Pedies” l va fora su Trentino Tv vigni sabeda da les 18.00 (sie da sera), de domenia da les 13.30 (mesa la does domesdì) e de lunesc da les 11.30 (mesa les doudesc).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

Se pel veder i servijes un a un su la piata Facebook de TV Ladina

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)